

四庫全書

史部

欽定四庫全書

史部

江南通志卷一百七十五

七十二

詳校官給事中臣丁雲錦

檢討臣德生覆勘

總校官編修臣王燕緒

校對官助教臣卜維吉

謄錄監生臣劉本立

欽定四庫全書

江南通志卷一百七十

人物志

藝術

一 江蘇松江鎮淮揚徐八府太海通三州

江寧府

後漢李南字孝山句容人少篤學明於風角永元中
太守馬稜坐盜賊事被徵南特通賀稜訝之南曰
旦有善風明日中時應有吉問旦日望景至晡乃

有驛使賫詔書原停稜事南問其停留之狀使者曰度浦馬踠足是以不得速乃服焉南女亦曉家術為由拳人妻晨詣爨室卒有暴風婦便上堂辭姑言已將亡因著其亡日如期果卒

南唐吳廷紹為太醫令烈祖食飴喉中噎國醫莫能治廷紹以楮實湯進而愈馮延巳苦腦中痛廷紹密詰厨人知平日嗜山雞鷓鴣投以甘豆湯亦愈羣醫叩之曰噎因甘起故以楮實湯治之山雞鷓

鵝皆食烏頭半夏故以甘豆湯解其毒耳

周文矩句容人仕南唐為翰林待詔工繪事精仕女後主令畫南莊圖後進圖於宋

徐熙江寧人高雅閒放善畫花木蟬蝶禽魚蔬藥南唐後主嘗以熙畫為宮中供設謂之鋪殿花

宋朱杰生而異相有隱德治人目如神針甫下而翳旋徹

王生金陵人瞽而善聽聲丁謂守金陵王生潛聽

其馬蹄聲曰叅政日中必召拜相果如其言後真宗晏駕謂充山陵使王生來京師俾聽馬蹄聲曰有西行之兆諸子責曰爾知相公充山陵使有是說耳生出語人曰蹄西去而無回聲恐有他命後果罷相分司西京繼貶崖州

劉虛白金陵人善相陳執中為撫州通判使者將劾之虛白曰無患使者果被召半道而去王益知韶州幾大拜還金陵召虛白問狀虛白曰當得一

都官止耳益不憚以他事繫之已而益果終都官
郎中

元陳梅湖善皇極數受知於世祖凡遇推卜多以易
數諷諫至江西宣慰副使或問何不為諸子計曰
吾數非其所當傳且命貧賤令其粗知農事足矣
明貝琳字宗器幼習儒精天官學被薦入欽天監正
統景泰間從征占候有功成化戊子因災異條陳
彌變圖治六事言多可采

陳遠字中復遇弟永樂初為翰林待詔繪事精雅
子孟顥善書

周文銓字汝衡家金陵取內經本草難經等書務
窮精奧診病立方多與衆殊嘗語其先輩顧璘曰
醫非盛德莫能操其慮非明哲莫能通其說知物
者巧知證者工知生者聖知化者神其持論精微
如此

丁毅字德剛江浦人路逢殯者棺下流血毅熟視

之曰此生人血也止鼻者欲啓之喪家不之信毅
隨至墓所強使啓乃孕婦也診之以鍼刺其胸產
一兒婦亦旋甦蓋兒手執母心氣踣身僵耳針貫
兒手兒驚痛開拳始媿通邑稱神著有醫方集宜
玉函集蘭閣秘方

國朝胡正言字曰從家居金陵嘗師法李氏登精研六
書著有印藪篆草諸書

龔賢字半千江寧人有隱操能詩章尤工畫

僧大振 劉琳 俱上元人工畫

談志學字習公江寧人工醫術尤精幼科全活嬰
兒甚衆貧者不取值人皆德之

鄭之彥字蘭巖江寧人少為諸生多病遇異人授
以刀圭遂精於醫名振江左

尹懷聖字安臣上元人有僧仲理菴者受學於異
人凡分劑不膠古法懷聖從之遊得其秘要療治
多奇驗貧者予藥餌不責報云

蘇州府

漢吳泰能筮會稽盧氏失博山鑪使筮之泰曰此物
質雖為金其象實山有樹非林有孔非泉闔閭晨
興見發青烟是香鑪也語其處求得之

三國葛衡字思真吳人明達天官能為機巧作渾天
儀使地居於中以機動之天轉而地止以上應晷
度

晉張弘字敬禮吳人光祿大夫善正書子彭祖龍驤

將軍善隸書王羲之每見其繡素尺牘輒取藏之
南北朝宋陸探微吳人善畫得六法之妙生平愛寫
古聖賢像

顧寶先吳郡人探之子大明中為尚書水部郎善
畫法陸探微尤工行書卓越多姿

褚允吳人年七歲善棋及長冠絕當代

齊褚思莊吳人以善奕名琅琊王抗第一品思莊與
會稽夏赤松第二品思莊嘗與抗對奕自食時至

暮一局未竟至五更方決抗睡於局後思莊達旦
不寐

梁張僧繇吳人丹青絕代嘗於金陵安樂寺畫四龍
不點睛言點即飛去人以為誕固請點之乃點二
龍須臾雷電破壁二龍忽失所在潤州興國寺苦
鳩鴿棲梁污穢尊像僧繇於東壁畫鷹西壁畫
鷄側首向簷外鳩鴿不敢入其神妙如此

顏協字子和吳人學書於范懷約藝過其師荆楚

碑碣多其所書官至湘東王記室

唐周廣吳人嘗師紀朋授秘訣觀人顏色即知疾病淺深不待診候開元中有黃門自交廣回拜殿下廣曰此人腹中將產蛟龍即不能活上問黃門有疾否曰臣在大庾嶺渴飲路旁水今腹中堅如石廣以雄黃丸下之吐出物長數寸鱗甲備具

陸柬之吳郡人官著作郎少依舅氏虞世南隸行皆入妙品李嗣真云柬之學虞草體用筆則青于

藍子彥遠傳父業授其甥張旭

史維則字天問吳人工八分飛白二篆在唐以八分名家者四人韓擇木蔡有鄰李潮與維則也歷翰林學士卒

張璪一作藻字文通吳人開元間官至祠部員外郎善畫撰繪鏡一篇言畫之要訣畢容見而驚異之嘗手操雙管一為生枝一為枯槿而四時之行遂驅筆得之一時號為神品

楊惠之吳人與吳道子同師學畫見道子藝成恥焉更為塑工遂稱天下第一手

石荆山吳人善琴為獨孤及所重每操琴以十合小豆為準盡一升而移品

姚蕪濟吳人善琴得石荆山傳在揚州逢異人授以清風景雲等五調世傳為廣陵散之遺音

顧生吳人大厯中以畫游諸侯之門每畫先貼絹數幅於地乃持墨汁及諸彩色各貯一甌生飲酒

半酣繞絹走十餘匝取墨汁攤寫絹上次寫諸色
乃以一長巾一頭覆於所寫之處使人坐壓生執
巾角而拽之迴環既遍然後以筆隨勢開決為峰
壑島嶼之狀

滕昌祐字勝華吳人工寫生尤長於畫鶴志尚高
潔脫畧時態

朱景環吳人算術精妙設肆盤門驛貞明中廣陵
王錢元繇鎮吳景環上書云到任後當三十年安

寧至天福辛丑記其事召問則曰算數定矣及期
薨

宋朱象先字景初吳江人善畫馳名元符間蘇軾嘗
題其畫云景初能文而不求舉能畫而不求售自
言文以達心畫以適意而已故妙入自然

趙伯駒字希遠千里之弟嘗畫姑蘇天慶觀進呈
孝宗仕至觀察卒葬支硎山周必大為神道碑

李珣吳人善律歷紹聖二年曾肇在滁命珣為漏

壺以順晝夜一郡則之

何充吳郡人工寫貌擅藝東南

毛松崑山人善畫花鳥子益乾道間畫院待詔益
子允升景定中畫院待詔皆工寫生能世家學

胡舜申其先由績溪徙吳舜申通風土陰陽之術
世所傳江西地理新法出於舜申嘗行郡四郭而
相之以為蛇門不當塞作吳門忠告一篇

葛應雷字震父吳人精於醫嘗著醫學會同二十

卷推五運六氣之標本察陰陽升降之左右其說
為詳核時按察判官李某中州名醫也因診父疾
復咨於應雷聞其論父子相顧駭愕曰南方亦有
此人耶乃盡出所藏劉完素張從正書與之討論
無不昭合張之學盛行於江南者從此始由平江
醫學教授遷江浙官醫提舉

元朱珪字伯盛崑山人善書法凡三代金石刻靡不
極意規倣久悟於石鼓嶧山碑之法纂舊書印并

自製附焉讀書十年不下樓楊維貞作方寸鐵志
唐杲字德明平江人伯父朴嘗過張秋值大疫為
藥貯大盎飲之所活數千人杲未冠名聞四方有
衛指揮妻立則如常卧則氣絕欲死杲言是為懸
飲飲在喉間坐之則墜卧則壅塞諸竅不得出入
而欲死也投以十棗湯而平

王某吳人業髹漆至正間嘗以牛皮製一舟外飾
以漆解卸作數節載至上都游漾灤河中觀者異

之又嘗奉旨造渾天儀可以折疊便於收藏其巧
出人意表為營匠提舉

明趙原字善長吳人畫師董源甚得其骨格明初召
天下畫士圖歷代功臣以應對不稱旨坐死

范暹字啓東崑山人有孝行善畫花鳥永樂中入
畫院供奉三十餘年博識雅淡為館閣名公所重
沈宗學字起宗長洲人博學善書能作徑尺大字
詹同評其書兼歐虞顏柳有冠裳珮玉氣象精醫

所著有本草發揮等書子貴成字志道亦博學能書

劉觀字士賓長洲人世以醫名永樂初擢御醫賜居第凡中外大臣有疾多命往治孫倫成化中為御醫又沈以潛吳誠施宗文盛繼者俱以醫著名於時又有錢瑛陳公賢俱世傳顛顛術吳下小兒醫推錢氏陳氏云

沈遇字公濟吳縣人善山水水墨淺絳深色種種

能之晚喜寫雪景世尤珍重

盛啓東吳人名寅以字行少從王賓學兼授醫術
某太監患腹鼓啓東設劑而愈太宗狩西苑太監
病新起往觀焉上驚其得生乃以啓東對即命入
見授御醫東宮妃病衆醫以為胎而久不產命啓
東診視疏方皆破血劑東宮怒不用數日病益急
復召診之曰必用臣當如前藥服之而愈

蒯祥吳縣人為木工能主大營繕永樂十五年建

北京宮殿正統中重作三殿及文武諸司天順末
作裕陵皆其營度能以兩手畫龍合之如一每宮
中有修繕中使導以入祥略用尺準度若不經意
既成以置原所不差毫釐初為營繕所丞累官至
工部左侍郎食從一品奉憲宗時年八十一猶執
技供奉上每以蒯魯班呼之

倪維德字仲賢吳人世以醫名維德少取內經研
其奧旨曰醫之道盡是矣病大觀以來多遵裴成

和劑局方故方新病多不相值後得金季劉完素
張從正李杲三家書讀之知與內經合自以所見
不謬出而用藥如神每言劉張二氏治多攻李氏
惟調補中氣隨世推移不得不爾也

朱鶴字松齡吳縣人工行草圖繪尤深於篆學印
章之文刻畫精工旁及雕鏤小玩罔不稱絕今簪
有朱松齡者蓋即以其字稱之子稚征字三松雕
鏤益奇巧興至始為之一罷嘗歷歲月乃成觀者

如市性嗜酒酒酣興發輒作灞陵風雪圖以寄蕭
颯之致

盧志字宗尹崑山人精素難諸家之書官太醫院
判武宗南巡召志志趣告諸大臣言冬得夏脉於
法不治願定皇儲以安國本侃侃闕宗社大計尋
致仕嘗與修本草著有醫學百問等書子梈嘉靖
間進士

王綸字理之崑山人以薦預修武宗實錄詩畫為

沈周入室弟子尤工篆隸楷法會修闕里文廟撫
臣以禮聘往穹碑大額皆出其手

許初字復初吳縣人以貢授教職書法師二王尤
工篆籀累官漢陽通判

陳天定字定之長洲人儒雅善畫喜元理家多名
幅故花草翎毛人物絕勝山水宗沈周

陳暹字季昭吳縣人善設色山水人物以畫名者
六十年

周臣字舜卿吳縣人學畫於陳暹而益工六法其
圖像大小古面奇妝綿密蕭散皆有意態纖穠麗
冶為世所賞

卞文瑜字潤甫長洲人工畫山水不名一家生平無
定居爐香茗椀到處自隨吳偉業九友歌有晚年
筆力凌滄洲幅巾鶴髮輕王侯之句壻俞絲字言
如亦以畫名

邵彌字僧彌長洲人畫山水極古秀之致書法歐

虞歿後人爭購之所著詩名頤堂集吳偉業畫中
九友歌云風流已矣吾瓜疇一生迂癖為人尤童
僕竊嘆妻孥愁瘦如黃鶴閑如鷗煙驅墨染何時
休

尤求字鳳邱長洲人仇英壻也以寫人物擅一時
嘗畫揭鉢圖天人帝釋羣鬼阿難各極變態見者
或起粟女適周牧夫婦皆工繪事

支鑑字汝同崑山人工書法蠅頭蟬翼具有尋丈

之勢至豐碑巨碣莊嚴卓偉無異小楷戲作叢篠
澗蒲蒼翠欲滴寫生家寶之

沈貞字士怡崑山人精醫學以傷寒難治取仲景
論為本而採李浩或問郭雍補亡由漢而下凡論
傷寒者集為傳名傷寒會通能補仲景之未備

繆希雍字仲淳常熟人好談古今成敗事如指掌
不以醫名而醫輒竒效又喜形家言著本草經疏
葬經翼時周維墀崑山人字仲補幼嗜學得咯血

疾棄儒業醫從希雍遊盡得其傳授太醫官

顧聽字元方吳縣人精於字學趙宦光纂說文長箋聽相與訂考其篆鐫刻印章為海內冠又造漏壺算刻度數不爽毫髮

馬士鯉字雲遠吳縣人精石刻四方名公所書碑碣必屬士鯉刻之天啓中為魏璫建祠立碑勅士鯉鐫刻士鯉聞而宵遁繼而魏大中被逮過吳門周順昌欲以女字其孫倉卒無媒士鯉遂通兩姓

之好大中榜掠坐贖士鯉四方奔募歸其子翰官
王綦字履若吳縣人工繪事寫山水花鳥俱蕭閒
靜遠性狷介杜門以畫自娛兼供晨夕不窺戶外
一步

國朝王簡字維文吳縣人精於吳道子寫生術下筆鬚
眉逼肖康熙初

召入供奉

恩賞甚渥

張宏字君度吳縣人畫山水蒼勁有致

沈顥字朗倩吳縣人畫清遠可愛亦能書善詩

王翬字石谷常熟人工畫幼摹一二名蹟王時敏見而奇之邀至西田別墅畫發所藏相與探尋翬大進而名起嘗奉

詔繪南巡圖年踰八十猶磅礴不衰同里楊晉字子鶴嘗受筆法於翬烟林清曠尤工村莊景物亦與翬同繪南巡圖

吳慙字漁山常熟人性簡淡自遠彈琴詠詩寫山水皆有高韻與婁東王時敏極相傾慕晚年絕人泛海莫知所終

顧聖之字德隣吳縣人父顧道人工於製硯人稱之為小道人所製硯皆倣古式樸雅可玩子死媳獨擅其藝者二十餘年

欽楫字遠猶吳縣人洞徹經史放志自適寓居僧舍終身不娶寫山水饒秀韻

顧樵字樵水吳江人畫入能品每橐筆游山水圖
而咏之流連忘返

高簡字澹游吳縣人畫清曠得倪瓚法亦能詩

黃鼎字尊古常熟人寫山水蒼古秀潤自稱獨往
客

何萬年字永錫長洲人善推星命決人休咎得失
多竒中韓莢為作傳

陸謬字其清吳縣人博聞汲古家多藏書手抄幾

及千卷有朱存理錢穀之風精賞鑑三代秦漢器
物及唐宋而下書畫名蹟四方士大夫之好古者
莫不就謬是正焉

松江府

宋李甲字景元華亭人善作翎毛有意外之趣蘇軾
題其畫謂郭忠恕後一人米芾畫史皆稱之

元曹永字世長知白字華亭人工八法正書學鍾繇
行草學二王又同邑章弼字拱辰未十歲能作榜

署大字長益有名

沈光明華亭人先世受術於龍樹師目疾內外障七十二種悉能療之光明世其學名益盛

陸怡華亭人善醫鄰人一夕溘死怡取馬桴去底置大釜上昇死者內之蒸以蔥藥及旦皮腐而氣復大德間召至京師賜號悅道處士

徐復字可豫華亭人精靈樞素問諸書其治病常審南北察彊弱而緩急投之故百不失一嘗療楊

維貞危症有歌紀其事

吳鍾山不詳其名家於華亭鍾賈山遂以自號遂
太乙九宮諸算術有奇驗楊維貞有數說皆稱述
之

沈瑞華亭人得畫法於黃公望嘗為楊維貞作君
山吹笛園木石幽潤山水清遠人物器具點綴絕
工又同邑曹煥章善寫生往往逼真嘗寫席帽山
人王逢像陶宗儀騎牛及濯足圖

明陳璧字文東華亭人得書法於長洲宋克篆隸真草流暢快健洪武中以秀才徵官州判郡人學書者皆宗之

相禮字子先華亭人能詩善畫尤精於奕洪武中召至京師厚賜遣歸劉基嘗以文贈之

徐樞字叔拱華亭人復子洪武末召為太醫院御醫屢奏奇績歷遷院使宣德初告歸展墓宣宗親賦詩送之予彪亦以醫名

朱孔陽華亭人永樂初求四方能書士寫制詞孔
陽被選又書大善殿榜稱旨授中書舍人北京宮
殿成皆命孔陽題榜兼善山水寫楊士奇歸田圖
人稱絕筆累官至順天府丞子奎亦工書能詩

楊青金山衛人永樂初以瓦工役京師內府屏牆
著堊有蝸牛跡色若異彩成祖顧視問之以實對
成祖嘉之役營北都宮闕使為都工青善心計凡
制度崇狹材用多寡悉稱旨事竣由營繕所官特

遷工部侍郎

沈景暘華亭人善卜永樂中召至京師命布卦問
英國公張輔征南事曰此大勝之兆時正午當得
捷音至時飛檄至報安南平上大悅賜鈔幣

章瑾字公瑾華亭人能詩善草書尤長於畫有寒
山拾得像及春江送別圖皆不愧古人

何全字廷用華亭人自宋元來世以醫名全領正
統丁卯鄉薦不徙故業益精其術每以匕劑起沉

病無責報意

姚蒙字以正華亭人善醫術得祖父之傳尤精太
素脉定人休咎若符契巡撫鄒來學召視脉蒙曰
公根器別有一竅出汗水來學大驚曰此隱疾何
由知蒙曰以脉得之左關滑而緩肝第四葉有漏
通下故也

張誼字履道青浦人好談易善占氣候倭寇入境
適至袁氏山莊出望雲氣拉主人疾走亡何賊突

入見空廬乃去時有友留啖檳榔力辭曰嘗逆不敢泊也解維不十里友果被創

孫克弘字允執華亭人尚書承恩子少敏慧博涉羣籍書做宋克尤工八分畫善寫生花鳥竹石無不臻妙歷官漢陽知府

浦澤字時濟上海人少從詹事陸深受書法能窮古人波磔之妙嗜酒好眠或一二期不起人呼小癡時華亭張德讓同邑張電亦受書法於深與澤

同名

宋懋晉字明之華亭人少學畫窮日夜臨摹古蹟
已從嘉興宋旭受學參以宋元遺法自成一家其
弟子同邑沈士充字子居名最盛

顧從義字汝和上海人嘉靖中詔選善書者入殿
直應試稱旨授中書舍人直文華殿擢大理評事
楷書行草宗鍾王徑尺大字仿顏趙著法帖釋文
考異

趙左字文度華亭人畫宗董源兼有黃公望倪瓚
之意同時丹青家以氣韻為士林所珍賞者左與
同邑吳振稱雙璧焉又有上海方叔毅善畫人物
神氣生動

國朝葉有年字君山上海縣人善畫山水明末肅藩聞
名禮聘至秦繪園築園名勝甲於八郡歸隱石筍
里購畫者無虛日卒年八十

朱軒字韶九婁縣人少學書於董其昌學畫於趙

左嘗謂古以畫為寫必以書入畫始佳郡中士大夫得其片鱗咸寶之

李中梓字士材上海人有文名善醫屢療危症皆奏奇效所著有願生微論內經知要諸書

劉道源字公原上海人與李中梓為中表因習醫盡得其妙所著有醫紫心印症脈合參等書子貞吉舉人為教諭亦精醫術

陳履熙字穆如華亭人善醫嘗遇異人授藥草一

篋技益神有病已絕及死二日者履熙決其可活
灌藥入口遂得再生

何汝閔字宗台華亭人
世精醫學汝閔尤多秘方
活病者萬計子嗣宗繼其學有名

潘光宗字耀先華亭人
世瘍醫光宗尤療治若神
貧者不受酬或資以參藥無不立愈
提督張雲翼病衆醫咸集禮聘光宗一診而出不復往
果不起
沈璠字魯珍上海人
上海名醫故有李劉徐沈四

家璠最後出名特著

顧昉字若周上海人初至京宋駿業集名手繪

南巡圖令王翬總其事昉得其秘遂以擅稱

黃楷字端又南匪人畫筆清拔尤工傳神時有虎頭之目

常州府

南北朝齊蕭子雲字景喬蘭陵人子範弟有文藻善草隸歷遷侍中尺牘之美遠流海外百濟國嘗使

人至建業求之

梁蕭賁字文煥南蘭陵人有才學能書善畫於扇上
圖山水咫尺之內覺萬里為遙終湘東王法曹叅
軍

唐許印宗義興人初事陳為新蔡王叅軍柳太后病
不能言諸醫莫能療印宗請以湯薰之如言果愈
仕隋及唐累遷散騎侍郎時關中多骨蒸病得之
必死印宗每療無不痊

丁謙宜興人工畫竹及花草品格清遠見重於世
五代董羽常州人善繪龍水海魚事李後主為翰林
待詔清涼寺壁有羽畫及元宗八分題名李蕭遠
草書稱寺中三絕

宋僧居寧毘陵人工畫草蟲名稱籍甚嘗醉畫水墨
草蟲長四五寸者筆力尤勁俊梅堯臣贈以詩甚
稱之

曹仁希字企之毘陵人善畫水為驚濤怒浪以至

輕波細縠一筆之間自分深淺為古人所未及

吳炳毘陵人工畫折枝花鳥紹興間為畫院待詔
賞賚特厚

許迪毘陵人工草蟲師僧居寧作黃花紫菜妙臻
神品

於清言晉陵人工畫荷花寧宗朝進所圖荷花障
特授承節郎孫務道世其學有名元世

明徐孟曾武進人善詩以醫世其家永樂間召至京

賜襲衣第孟恂工砭法時稱二仙

蔣子成宜興人善畫山水人物其水墨大士像尤為世所珍永樂間徵入京師與同時趙廉畫虎邊文進翎毛並推絕技

王玉字汝瑛宜興人成化末舉名醫隸太醫院弘治初每用藥有奇効寵賚甚渥累官通政使有醫案傳世

吳傑字世奇武進人弘治間以名醫徵至京師都

御史王鉞方鎮大同聞傑名以調治邊軍請臺省
爭言醫如傑當在供奉不宜出之邊地下禮部試
之果無逾傑者薦入御藥房後療武宗疾屢奏奇
效擢御醫至太醫院使子希周由進士官給事中
惲本初字道生武進人少為諸生工畫山水以貢
授中書舍人

國朝唐宇肩字若營武進縣人性孝善書法家貧賣字
以供甘旨與郡中惲格畫並珍於時

屠遠字帆輕武進人博學能詩尤工畫山水蘭竹
同邑陳儀字象彩詩詞筆墨與遠伯仲

周榮起字硯農江陰諸生能詩文工篆書尤精繪
事論者以為得米家精意女禧亦工詩畫片紙殘
縑為人寶貴同邑有高方者字義立亦工書

邵曾復無錫人畫花鳥師惲格人耿介亦似之

鎮江府

宋孫守榮一名高榮世居富春因自號富春子後居

京口病瞽遇異人授術以音律推五數播五行萬物終始盛衰一於音決之周坦未第時坐市肆厲聲詬僕守榮揖曰狀元何怒也周不答後果廷試第一或持金玉請辨其色摩挲之美惡立判其神竒類此

明徐景暘善吟詩通繪事一時賢公卿皆與之游有薦於朝者以母老不仕宋學士瀛作畫原以贈焉何淵字彥澄丹徒人精於醫徵隸太醫院仁宗禮

遇極隆欲官之不受給太常寺正卿俸

錢原濬字彥深丹徒人通醫術著集善方三十六卷

錢寶字文善原濬曾孫工行楷精醫術著醫案運氣說復齋集

蔣曉字東明丹陽人世業醫偶從黃冠賣卜者游得其保幼一編治疾奇驗有王氏子方週歲忽不乳食肌肉盡削醫疑為疳曉曰此相思症也衆唾

笑之曉命取兒平時玩弄之物悉陳於前有小木魚兒一見喜笑疾遂已

蔣守成字繼之丹陽人畫法吳仲圭趙千里游文徵明父子間煙雲竹石盡其妙

何應璧字繼充丹徒人性穎悟貫穿醫書數千卷貧者病濟之藥更助以資鎮江良醫稱何氏又有何曠字仁源亦不計後酬報能起危疾

國朝祁嗣錄字肖虛鎮江崇福觀道士精鍼砭多秘方

治諸異毒無不立效

毛一駒字子干少習經史尤精數學名公鉅卿屢
物色之托疾弗起卒茅山中子翥字際生傳其術

淮安府

南北朝徐秋夫鹽城人仕至射陽令工醫善鍼灸嘗
夜聞鬼聲呻吟甚苦叱問之曰身是斛律斯雖死
患腰痛聞君善醫求拯拔秋夫曰汝鬼術何從施
曰以草束形呼我名治之如其言下二鍼設祭埋

之夜聞鬼來謝云疾已愈時謂其術能通神

宋衛樸楚州人病瞽精於律凡古厯算數命書過耳
一讀即能暗誦熙寧中撰奉元厯

廉布字宣仲山陽人自號射澤老農畫山水尤工
枯木蘂竹師蘇軾而得其神官至武學博士

元趙清澗淮人工畫人物士女

揚州府

宋桑景舒高郵人善聽百物蟲鳥之音以占災福又

精音律嘗製虞美人曲對花奏之花動搖不止

杜嬰字太和真州人好讀書精醫術無貧富貴賤請之輒往與之財非義輒不受時時窮空而曠然無累於物善言性命之理王安石嘗云每與杜君語久而不厭卒後作詩傷之稱其接物能齊物勞身耻為身云

陸仲仁高郵人精繪事嘗畫三高圖獻鼂以道

徐仲堅真州人隱於筮遇人至謹雖疾病召之筮

不正衣巾不見能為詩亦好屬文多為賢士大夫所知有集若干卷

元王仲明江都人善醫平章庶希憲疾世祖召仲明治之未即行人強之曰君能起庶相國是惠及天下也仲明適往投以一匕立愈欲官之辭不就

明陳君佐江都人善方脉洪武初為御醫永樂間棄官著黃冠服市藥武當山中以易卜人吉凶多奇

中

滑壽字伯仁家儀徵性警敏醫名籍甚江淮間在淮南曰滑壽在吳曰伯仁氏在鄞越曰櫻寧生著素問鈔難經本義十四經發揮皆行於世

殷槩字度卿儀徵人家世名醫至槩尤精萬厯癸未歲大疫至比閭闔門不起槩晝夜鱗次奔問所活數千百人皆不受餽遺時號為殷仙

劉松泉儀徵人善醫術視疾無貧富悉奔其急每夜歸則舉所得藥金不篝燈視而雜聚之家人詰

其故曰恐有豐嗇美惡作區別心不如渾也一日
夜歸有偷兔穴壁而入即以所得金悉與之誠曰
此足汝為活無復為也其人慙謝去晚年失子妻
為買婢以進嘖感曰吾老矣奈何誤人少女製妝
嫁之壽至七十餘一日沐浴冠服端坐而終

李瞻字小塘儀徵人以眼科名大學士王錫爵兩
瞳反背瞻令端坐置書於几用金針從腦頰刺之
初撥曰見黑影矣再撥曰見行道矣三撥則筆畫

朗然曰君其神授耶以千金謝瞻却不受某舍有
茶僮火爆眯目瞻為縛僮於柱手探取其睛寸許
洗之炭屑出而目愈著有育神夜光九方蓮子金
針鼠尾金針說今其書盛傳

方新江都人父選字以賢精醫學有羸餘輒以給
宗黨之困者新精奕有神解六七歲時觀選與客
奕語選曰客某道瑕可攻不信比收局客戲謂新
曰童子知我瑕乎吾不畏攻也新再為布子如前

不差一道指選攻之客大敗比州角郡中人皆無
敵手與海內稱第一品李時養奕初遜李一子翌
日已雁行矣

國朝唐志契揚州諸生精於繪事有元人風第志尹精
花鳥時稱二唐

羅慕菴徽籍移家泰州精於醫著有醫宗粹言四
十卷

徐州府

漢樊阿彭城人學鍼術於華佗凡鑿咸言背及胸臍之間不可妄鍼鍼之不過四分而阿鍼嘗入一二寸至胸臍乃六七寸而病者皆瘳壽百餘歲

三國朱建平沛人善相術鍾繇曰唐舉許負無以加也

南北朝宋劉瑱字士溫勔孫少有行業文藻篆隸丹青並為當世所稱時有滎陽毛惠遠善畫馬瑱善畫婦人並為當世第一

齊垣榮祖字華先下邳人護之從子善彈登西樓見
翔鵠雲中謂左右當生取之於是彈其兩翅毛脫
盡墜地無傷其妙如此終兗州刺史

明李冠字公冕徐州人博學能詩文善隸書以鑿名
裴仕傑徐州人通儒書習陰陽之術永樂初徵與
纂修古今大典仕傑以陰陽家預焉

孟思賢沛人工繪事尤精泥金人物萬厯間召見
命寫容稱旨授錦衣衛千戶

姜居安沛之沙河鎮人以醫名時有貴官攜家過沙河稚子病居安令以沙一斗布舟中卧免其上久之疾良已問其故曰小兒純陽當春月而衣被皆湖綿過熱故得涼氣而解

宗文魁徐州人為瘍醫多奇效而性好施事母以孝聞

素貫徐州人精鑿術有老狐貌為人詣貫治疾貫診之識其為獸狐告實與藥愈之有貧家婦以難

產死昇棺往瘞血出於隙貫見之以為血鮮未死
啓而治之復蘇

國朝路可泰蕭縣人五歲目盲為陰陽星候術數之學
歷有神驗晚年學修煉於果老洞中

崔嶽銅人精幼科著痘疹詳辨行世

太倉州

元宋尹文字文璧崇明人官應奉翰林文字嘗學琴
於秋山徐氏指法精妙大德間魯國公主聞其名

召至奏胡笳十八拍公主嘉歎賜金歸老精六壬
遁甲之術推測亦多奇中

明張觀字可觀嘉定人畫山水師夏圭馬遠又與盛
懋吳仲圭遊故筆力古勁無俗氣

陳光遠僑居安亭鑿術神異所善客子以瘧死攜
樽將之野道遇光遠視之曰而兒不死吾當活之
取沙遍壅其體命衆羣擊鉦鏡之屬觀者以為
誕也有頃兒忽動尋活客問其故對曰兒苦水

痘無力自達得土氣乃疏金為水母鳴則水應而出矣

馬軾字敬瞻嘉定人精於占驗正統間以天文生從征粵中時賊勢猖獗督師董興猶豫欲請益兵軾見大星夜隕言賊平不過四旬之內宜速戰卒如其言

陳嘉言字可彰崇明人由歲貢為壽州學正工作花鳥神致如生人咸珍之

朱禮字用和崇明人善籀篆楷書得顏柳法以能書薦授戶科給事累擢尚寶卿

仇英字實甫太倉人工臨摹能亂真繪寫人物以及翎毛花竹無不精妙女號杜陵內史繪畫亦有父風

吳震先字長卿太倉人以舉人為德安府通判精於識緯知明季數丁陽九喟然曰從今便高卧已負十年間因作負半庵杜門著述周延儒強之出

不應

施文會字志學崇明人少為諸生尋以病廢學旁
通濟虛術善聆人聲音以定吉凶厯厯不爽

國朝傅璪字汝文嘉定縣人精於鑿鄉人黃氏家疫延
璪且至聞鬼相與語曰傅公來奈何一曰吾覆其
藥耳已而藥輒覆黃語璪璪親持與飲遂起有沈
太學妻死未殮璪曰此尸厥耳不死也治藥灌之
應手而甦

海州

宋徐易海州人善畫魚兼工雜畫第白及族人臯皆以畫魚名

通州

明張榮字伯仁家如臯精醫好義嘉靖乙未邑駐兵禦倭軍中大疫賴榮治得起者無算隆慶末下邳治河臯人往役者疫死過半榮自請往治夫役俱架茅蓬卧地上榮匍匐入一一療之

馮鸞通州歲貢生精岐黃術為郟西知縣民有疾
具呈求方輒效上官及同寮遠近延之後歸解所
得藥金遺諸子曰此從一部本草中來非官資也
著醫學大成傷寒統會醫說補遺

國朝陳若虛通州人也為瘍醫有秘授能起死著外科
正宗

素璜 張經俱通州人丹青集衆家之長為時所
珍

Handwritten characters and markings on the left margin, possibly including a date or reference number, such as "1947" and "10/10/47".

A large rectangular area containing multiple vertical lines, which could represent a table with columns or a series of vertical bars, but it is currently blank and difficult to discern.

江南通志卷一百七十

欽定四庫全書

江南通志卷一百七十一

人物志

藝術二

安徽寧池廬鳳潁七府滁和六泗四州

安慶府

明何公冕潛山人遇異人授符籙習之能呼風雨役鬼神會歲旱郡守呼令祈雨公冕對役笑曰吾非汝可呼者但汝往來烈日良苦吾書符汝手令握

固馳府即有片雲覆頭役至守怒獨來役告以故
令開掌則雷電交作莫不驚懼守躬往迎之公冕
曰上帝封雨部當暫取揚子江水解熱澤及五十
里耳移時大雨如注雜魚蝦齊下

史仲宏桐城人少習形家言遇異人以青烏祕訣
授之遂臻其妙曾卜投子山陡嶺一穴法當大貴
於除夜行衢巷暗聽之有機杼聲讀書聲嬰兒聲
者即授之具者惟方德益家即以相昇後科第蟬

聯不絕

張達泉懷寧人精醫得異授顏銓部渾為兒時中
痘已死達泉視之曰未死也急掘地作坑置兒其
中取新水數桶用紙蘸之重貼身上少頃有細煙
起兒手微動達泉喜曰生矣復水沃之氣蓬蓬上
蒸大啼數聲乃取起進以藥旋愈

周公穆桐城人幼見其父與人圍棋劣不勝心快
快乃畫紙為局張於卧榻上仰視彌月忽請於父

曰幸呼前奕者來兒當勝之父以為謾也姑試之
連勝三局其人斂手退曰是兒他日當為國手年
三十遂以絕技名

國朝陳延字遐伯潛山人幼而多慧凡技之善者見即
摹仿酷肖尤精篆刻延折右手一切書畫皆用左
腕遷鳩茲與蕭雲從稱畫苑二妙著孤竹詩集行
世

嚴宮方字則菴桐城人業醫方書靡不窺覽榮衛

虛實辨晰微茫尤善治奇病多人所不解者

楊磊字嘉玉桐城人尤森博極羣書名公鉅卿交
辟之磊學行精通尤邃醫理活人無算與嚴宮方

齊名

徽州府

宋吳源字德信休寧人神於醫授翰林醫官

程惟象婺源人善占算英宗在潛邸豫言其兆既
登極賜以御書

江嘉婺源人精醫術病疫家夢一神曰吾避江君病者遂愈

張擴字子充歙人稱良醫有傷寒昏惰擴曰此嗜卧證三日必蘇蘇則必飲飲以此藥必睡睡覺當得汗而愈果然又有患嗽人以為勞擴飲以藥忽大吐視涎中得魚骨宿疾頓愈

范天錫字壽朋休寧人診脉決死生為郡醫最元徐存誠祁門人善醫蓄藥救人

明劉然字季然歛人善行楷書

楊明時字不棄歛人工詩辭書畫

吳羽字左千歛人善寫佛像山水花鳥氣韻生動
江副護休寧人精醫著有試效集成暨諸醫書行
世以賣藥金建亭通衢

游朝宗婺源人精地理永樂時卜建天壽山朝宗
尤見褒賞

余有道婺源人善丹青懸鷹於堂能驚雞雀

汪機祁門人著醫案本草會編素問抄脉訣

胡田祁門人善鍼灸為太醫院御醫

陳嘉謨祁門人善醫著本草蒙荃

國朝許寧字裕卿以醫往來歛休閒有奇效能以手代
鍼用推拈法世罕其傳著逝氣符醫紀黃遊諸集
行於世

徐起字仙客歛人精六書工摹印

寧國府

唐夏榮有相術蕭嵩陸象先為僚壻時蕭嵩未仕陸
已任洛陽尉榮謂象先曰陸郎十年位極人臣然
不及蕭一門貴而且壽人未之信天寶中嵩兼中
書令年八十餘子華歷中書侍郎同平章事乃
服其水鑑云

紀叟善釀嘗飲李白以酒既卒白哭之曰紀叟黃
泉裏還應釀老春夜臺無李白沾酒與何人

陳氏能作筆家傳右軍與其祖求筆帖子孫世精

其法

包貴善畫虎其子繼之皆傳於世

宋諸葛高世工製筆梅堯臣次歐陽修試諸葛筆詩
云筆工諸葛高海內稱第一林逋云頃得宛陵葛
生筆如麾百勝之師橫行紙墨所向如意

元徐文中字用和善鍼術鎮南王妃患風文中診脉
按曲池而鍼潛入焉妃殊不覺移晷手足竝舉次
日起坐

明方希叔字元甫宣城人善八分書精繪事其畫草
蟲用淡墨而飛動如生得服氣養生之術年九十
餘

查萬合字了吾涇縣人鍼術最精人稱半仙

劉貴炳字斗南旌德人醫術得異人之傳臨症自
出新意不膠古方明季大疫施禁賑饑人皆德之
周子幹字慎齋太平人知道術嘗經柏葉山見石
塞路幹祝而去之一夕震雷石裂行旅坦然

李治字赤山太平人工書筆勢道勁欲透紙背

蔡子仁字梅坡太平人善寫真嘗作三樓一閣圖
得李昭道父子遺法

國朝畫僧半山徐姓名在柯善畫得倪瓚吳鎮沈周筆
意

王猷字肇宗宣城人少業儒後遇異人授以導引
術遂隱於卜占決無不奇中嘗以日者之言多謬
著九十四家年月考及算數三式切韻等書傳於

世

劉光揚宣城人善鐫碑碣近快雪堂琅華館諸帖皆其所鏤刻宋荦嘗作歌以贈之

池州府

宋張賁字元明青陽人為宣州司理工畫

元陸仲遠青陽人精醫術能察腠輪經脉審榮衛順逆著千金聖惠方

太平府

朱祝次仲字孝友太平人工山水尤善草書

明彭正字思直當塗人永樂間以良醫再使西洋子
賓世其業天順壬午乘傳診療諸王所至奏效

楊瑗字師遊當塗人官王府教授善繪園圃菜茹
其支莖細嫩葉蝕蝸篆處生趣盎然

從任字子重繁昌人官黃州府經歷負奇氣兼嗜
異書於天官律歷戰陣醫藥太乙奇門遁甲六壬
皆探得其要占驗如神太史焦竑稱為絕技

國朝濮澄字仲謙當塗人有巧思以鏤刻名世

陳醇儒字蔚宗當塗庠生工漢隸八分書尤長於

山水

俞文字武先繁昌人善行草書畫亦入能品

芮養仁字六吉當塗人精於醫著有醫經原始諸
書

沈大望字震甫蕪湖人精岐黃之學窮乏人病者
輒出復菴療之懷宗時太池時疫大作奔馳救治

無算

廬州府

晉韓友字景先廬江舒人善占卜圖宅相冢行京費
厭勝之術消殃轉禍無不奇驗于寶問其故友曰
筮卦用五行相生殺如按方投藥治病以冷熱相
救其差與不差不可必也元康六年舉賢良元帝
渡江以為廣武將軍

杜不憊廬江人少就外祖郭璞學易卜有奇驗郗

超嘗試之歎曰雖管郭何以尚此後為建威叅軍
宋趙廣合肥人李伯時家小史久侍伯時畫亦工其
藝建炎中陷賊賊聞其善畫使圖所掠婦人廣不
肯斷其右手拇指遣去而廣平生實用左手亂定
惟畫觀音大士而已

明李恒字伯常合肥人洪武初擢周府良醫嘗奉旨
集袖珍方諸書年老致仕王親賦詩以餞命長史
瞿祐序其事

林時合肥人善太素脈有一妊婦求治時語其家人曰夏得秋脈定死當在庚申辛酉間果驗

郭民安巢縣庠生攻醫術遇病者如痼瘵之在己乙亥被圍民安登埤協守城陷後令以下皆被執不屈賊次第殺之將及民安忽一賊奔救曰八十老翁降之何用殺之何為因得放歸後追記其人乃昔年窮途病夫施藥愈之者也

趙修祿巢人工畫馬寫大士千幅

徐體乾巢人其占用左邵法與焦氏易林相符契
其天文得之劉誠意皆著有成書

國朝許學文合肥縣人精醫尤善幼科著有痘科約言
保赤正脉二書

鳳陽府

漢董奉居鍾離為人治病輒愈重者種杏五株輕者
一株遂有萬株今鳳陽縣南有杏山

唐崔白濠人工畫尤精花卉翎毛

宋惠崇壽陽人工詩畫有名于世

金武正宿州臨渙鎮人祖某官太史靖康後棄官歸
農正精易數貞祐間行樞密院以上客禮之軍士
所諮其應如神

王博 韓榮皆醫道通神宿州衛百戶李泉少時
弱疾不起延二人視之韓決其速愈壽八十餘王
再視謂八十四後皆如其言

元朱肯堂荆山醫士慕董仙壺公之為人五世知名

明趙道震字處仁精醫術洪武間自金華徙籍定遠
活人甚多永樂時召修大典運氣書年八十四卒
著傷寒類証傳于世

郝志才鳳陽人深通醫理高帝病甚志才以鍼調
氣以藥理中未幾霍然授為太醫院判

何欽字大敬懷遠人精醫學者請究其術欽曰先
讀易以察時變讀禹貢識九州山川風土博極方
書歸約於內經始可與言耳王鴻儒奉使鳳陽疾

作延欽一劑而愈鴻儒為文紀之

國朝陳應鶴鳳陽縣人善作草書丰骨道勁人爭寶之
薛嘉猷字若采定遠學生工詩文尤善草書人呼
為薛字

潁州府

後漢華陀字元化沛國譙人游學徐土曉養性之術
年百歲有壯容史所載醫術精竒世稱為神曹操
苦頭風眩陀鍼隨手而差其絕技皆此類後操以

召之不至怒為所害

晉隗炤汝陰人善於易臨終書版授其妻曰吾亡後當大荒窮慎勿賣宅後五年有詔使龔姓來頓此亭此人負吾金即以版往責之炤亡其家大困至期果有龔使者止亭中妻償版責金使者惘然沉吟良久曰汝夫何善曰善易使曰噫我知之矣乃取蓍筮之卦成撫掌曰妙哉隗生所謂含明隱迹者也因告其妻曰吾不負若金汝夫自有金五百

在堂屋東頭去壁一丈入地九尺知吾善易故書
以俟耳妻還掘之如其言

明張玠字秀甫潁州人善醫有監司病塊投大黃數
兩弗動玠曰脈細而附骨氣口虛是積在中央氣
轉無力大黃反消胃耳法當獨後兩餘可下如其
言果下痰若敗卵數升陸吏目心痛玠曰水溢脣
正黑此蟲也投苦練下蟲滿匝他神驗皆類此

張葵潁州人正德己卯舉人能作飛白書徑數丈

頗有奇氣畫法直逼馬遠世多寶愛之

滁州

明魯文賢字子良全椒人善醫從太祖渡江進藥屢
効授太醫院判

和州

晉陳訓字道元歷陽人少好祕學天文歷算陰陽占
候無不畢綜尤善風角言未來事悉驗

宋徐兢字叔明歷陽人舉宣和中進士歷書學博士

篆籀得李斯法畫亦入神品山水人物俱冠絕

六安州

明李玉字成章六安本衛千戶善騎射尤精鍼灸人

號曰神鍼李玉

吳鵬習堪輿家言萬曆二十七年礦稅忽開奸人

乘隙規利欲徧發霍蓼金斗諸山人心皇皇鵬為

危論以動中官全廬得免發掘之禍所著有五寶

經

朱雲成徽人居於六形貌狂易酒後吐言雜以啼
笑皆寓人生死禍福已輒竒中郝進士某謁選問
何任為誦臨帝子之長洲得仙人之舊館及令豐
城調新建亭有額曰仙人舊館諸生郝慕孩少頰
異雲成每見必哭曰水仙子後覆舟彭蠡死壬午
五月賊至今卜之哭曰我在數中已而賊夜襲城
屠戮殆盡雲成亦遇害

聶寵六安人習醫善診脈父卒侍叔父疾刺股血

和藥進之遂愈鄉人遺孤女寵收養之治奩以嫁
貧者輒往治之不責報

泗州

宋楊介字吉老盱眙人善醫著傷寒論脈訣行世徽
宗嘗苦脾疾國醫進藥不效介言飲水太過以米
煎大理中丸服之遂愈

明徐安字古瀛盱眙人正德時年七十餘博學多能
尤長算數所著有算法三卷

--	--	--	--	--	--	--	--	--

五
十
五

十

江南通志卷一百七十一

欽定四庫全書

江南通志卷一百七十二

人物志

流寓

一

江蘇松常鎮淮揚徐八府太通二州

江寧府

三國諸葛瑾字子瑜琅琊人避亂江東孫權用為司馬遣使蜀通好與其弟亮俱公會相見退無私面或言瑾別遣親人與備相聞權曰子瑜之不負孤

猶孤之不負子瑜也子恪最知名

張悌字巨先襄陽人孫休時為丞相晉伐吳悌督
沈瑩諸葛靚逆之牛渚軍敗靚牽悌去悌垂涕謂
靚曰仲思今日是吾死日也我兒時為卿家丞相
所拔常恐不得死所負名賢知顧今以身殉社稷
復何遁耶悌宅在板橋浦死葬其地

是儀字子羽北海營陵人避亂江東吳主徵典機
密使輔太子又領魯王傳規諫盡忠生平不治產

業家無儲畜權對之歎息即增俸賜益田宅儀累
辭讓以恩為戚事國數十年未嘗有過權歎曰使
人盡如儀安用科法為

晉王導字茂弘琅琊臨沂人覽之孫也隨元帝鎮建
康勸錄用吳士顧榮賀循輩以收人心晉室既建
導相之草創經營百務具舉時稱江左管夷吾焉
王敦之叛導以骨肉包荒蘇峻舉兵導以宿望獲
免歷事元明成三朝

王承字安期司徒渾之從子太原人仕為東海太守尋去官至建鄴為鎮東府從事中郎渡江名臣王導衛玠周顛庾亮之徒皆出其下子孫蟬聯與琅琊諸王並盛

謝安字安石謝氏自陽夏徙江左安為鯤從子尚從弟少有高名累辟不就年四十餘始赴召仕簡文孝武之朝桓溫志慮叵測符堅重兵壓境安能內輯外攘銷禍變於從容淡定之中相業與王導

齊名而風韻過之游賞東山輒隨聲妓固其所以自托也

周顥字彥倫其先汝南人也居鍾山下清貧寡欲王儉問山中何所食顥曰赤米白鹽綠葵紫蓼後應詔出任累官國子博士著四聲切韻

范甯字武子南陽人篤學通覽嫉時俗虛浮相扇著論言王弼何晏之罪孝武時為豫章守大設庠序取郡四姓子弟皆充學生課讀五經免官家於

丹陽猶勤經學終年不輟著穀梁集解

顏含字弘都琅琊華人渡江後居建康含少有操
行以孝聞善事兄嫂由是著名歷官西平縣侯拜
侍中除吳郡太守郭璞過含嘗欲為之筮含曰自
有性命無勞筮龜桓温求婚於含以其盛滿不許
或問江左羣士優劣答曰周伯仁之正鄧伯道之
清卞望之之節餘則吾不知也其雅重實行抑絕
浮偽如此

南北朝宋雷次宗字仲倫豫章人少慕栖逸文帝徵
至建康為築室鍾山西崑下名招隱館使為太子
諸王講喪服禮經

齊明僧紹字休烈平原人先隱長廣郡嶠山後渡江
住攝山白雲庵偶過定林寺齊高帝欲就寺見之
即遁去

梁庾沙彌鄆陵人居金陵父坐事誅五歲製采衣輒
不肯服母問其故曰家門禍酷用是何為及長終

身布衣蔬食嫡母劉氏亡哀號動隣里葬在新林
自生旅松百許株梁武帝召見嘉之補歛令復丁
生母憂喪還都濟浙江中流遇風船將覆沙彌抱
樞號哭俄而風靜咸以為孝感所致

陳馬樞字要理扶風郿人梁邵陵王引為學士侯景
之亂隱於茅山陳文帝徵之不應樞行義素著所
居處盜賊不入依托者常百餘家

五代韓熙載字叔言北海人才氣逸發多藝能善談

笑為風流之冠為南唐祕書郎知制誥詞命典雅
與徐鉉齊名時號韓徐契丹入汴晉帝北遷熙載
勸元宗經營天下不能從周太祖有天下有議北
伐者熙載以為不可嘗使周歸論周之將相曰趙
點檢顧視非常殆難測也後咸服其識卒謚文靖
葬梅岡謝安墓側

宋王安石字介甫臨川人罷相居金陵自號半山居
士後捨宅為寺居白下門卒葬鍾山

鄭俠字介父福清人治平初隨父官江寧監稅讀
書清涼寺

胡銓字邦衡廬陵人南渡初上封事力詆和議遭
貶斥志操愈烈官至資政殿學士卜居建康

阮思聰字仲謀固始人累官吉州團練使來居建
康曾請賈似道以重兵守鹿門山由海道搗青齊
則襄園自解不聽有知人鑒薦李玨於朝識張世
傑於初歸時後著忠節

元張顓字達善導江人蜀亡僑寓江寧學於金華王
柏之門至元中行臺中丞延至江寧學宮遠近翕
然師尊之著有經說及文集人稱導江先生

張雨字伯雨錢塘人為句曲道士有詩名句曲外

史集

明童軒字士昂鄱陽人隸南京欽天監籍景泰辛未
進士授南吏科給事時貢翠毛魚魷諸物以萬計
上疏諫止蜀寇起命軒往撫遍歷賊巢宣布恩德

賊悉解散官至南禮部尚書

周瑄字德孚陽曲人由鄉貢累官至刑部尚書以
洗冤澤物為己任戒諸司事非會勘者不得出五
日以是獄無滯囚致仕後家金陵卒謚莊懿子經
亦仕至尚書

唐時字宜之烏城人仕楚府長史棄官歸築室烏
龍潭上資稟高潔飄舉世味之外嘗作蓮花世界
書以寄懷

張國臣字允忠遼衛官籍崇禎戊辰進士知長垣
盜息訟稀擢兵部郎監軍山東罷官後僦居白下
子登明中書舍人

國朝黃國琦字石公新昌人明崇禎丁丑進士仕至兵
科給事奉母南歸家金陵雖為寓公於地方利弊
知無不言故當道咸禮重焉

黃文煥字坤五福清人由山陽令入翰林歸寓金
陵著杜詩掣碧史記莊子注

周亮工字櫟園先世自金陵徙居撫州之櫟下其
大父復自櫟下徙江寧又徙大梁江寧其游止處
也亮工明季進士敷歷中外二十年能文章尤好
士士咸向往之

王弘祚字玉銘雲南人官至兵部尚書致仕歸道
過金陵愛栖霞天闕之勝遂家焉卒葬茅山

張自烈字爾公袁州人僑居白門著四書五經辨
及古今文辨

王澤弘字涓來黃岡人順治乙未進士入翰林官
至禮部尚書其任總憲請移湖口關復置九江奏
免江西水脚銀沮官民流徙烏喇致仕後僑居江
寧相羊山水有香山洛社之致

杜濬字于皇黃岡人明諸生僑居白下以詩名自
景陵鍾氏譚氏矯王李規摹漢魏之習流而入於
淺薄獨濬不染楚風著變雅堂集時有莆田余懷
字淡心子賓碩字鴻客居金陵皆以詞翰知名

熊賜履字敬修，感人順治戊戌進士，累官兵部尚書、文淵閣大學士，著道統學統等集，立體致用，朝野交孚，致仕後卜居清涼山側，寒素自持，與儒生等卒，謚文端。

陶窳字甄夫，巴陵人，父泓沒于滇，之教化長官司地，窳攜幼弟徒步六千里歸楚，經營瑩域，復隻身奉母，扶父柩歸，工詩文，又精書畫，能篆刻，晚居金陵。

蘇州府

周澹臺滅明字子羽武城人孔子弟子少孔子三十
九歲狀貌甚惡欲事孔子以為材薄既已受業退
而修行行不由徑非公事不見卿大夫南游至江
從弟子三百人設取予去就名施乎諸侯史記索
隱注吳國東南有澹臺湖是其遺跡

范蠡字少伯事越王勾踐滅吳成霸功遂泛舟遊
五湖莫知其所終今吳之蠡口越來溪等處皆其

遺跡

漢梁鴻字伯鸞扶風人少孤貧尚節介過京作五噫
歌肅宗聞而非之求鴻不得乃變姓名挈妻子適
吳依大家皋伯通居廡下為人賃舂妻孟光每具
食不敢仰視舉案齊眉伯通察而異之乃舍之於
家鴻閉門著書十餘篇迨卒伯通為葬於要離冢
傍曰要離烈士伯鸞清高可相隣近妻子歸扶風
蔡邕字伯喈陳留人仕左中郎五原太守王智密

告邕謗訕朝廷邕乃亡命江海遠跡吳會吳有燒
桐以爨者邕聞火烈聲知良材因請而為琴果有
美音而其尾猶焦故時人名曰焦尾琴

南北朝梁顧越吳郡鹽官人仕梁為博士侯景亂避
難東歸栖武邱山入陳為黃門侍郎

唐皮日休字襲美襄陽人咸通中進士崔璞守蘇辟
為軍事判官居吳會與陸龜蒙倡酬詩甚夥奉守
命禱晴於洞庭探洞庭諸勝有太湖詩一卷又借

書於徐修矩偃息於任晦林池自云遊二君宅無
浹旬之間焉

楊收字藏之世居馮翊父為濠州錄事參軍客死
姑蘇收七歲而孤母親授經十三通大義善屬文
吳人號神童及壯博學強記及他藝無不通擢進
士杜棕表署淮南推官累官至同中書門下平章
事

宋蘇舜欽字子美開封人歷官大理評事以范仲淹

薦為右集賢校理監進奏院在朝數論事為王拱辰所構去官居吳門得吳越錢氏池館置水石作滄浪亭益務讀書為歌詩以寫憤懣善行草書每酒酣落筆爭為人所傳寶後為湖州長史卒

李中行字無晦湖州人徙居吳江高尚不仕以詩酒自娛治園亭於松江之濱晚好醉眠蘇軾諸人皆有詩題詠

尹焞字彥明洛陽人師事程頤應舉發策有議誅

元祐黨人惇不答遂棄去紹興中歷官禮部侍郎
請奉外祠寓平江虎邱西菴今讀書堂尚在

方惟深字子通泉州人寓居於吳負詩名王安石
重之謂元白皮陸有未及處安石柄政略無迎合
意杜門陋巷孝友耿介與朱長文同為一時所宗
鄭準字器先開封人寓崑山歷知袁州輕財好義
買田贍族有范仲淹風

劉過字改之廬陵人宋南渡後以詩俠名湖海間

詞氣橫放英特無前陳亮陸游辛棄疾皆折節與
交嘗抗疏光宗請過宮屢與時宰陳恢復方畧力
請用兵謂中原可一戰而取詞極剴切故人潘文
友宰崑山延致之過雅志欲航海因抵崑卒葬馬
鞍山

周南字南仲岳州平江人游學吳中與孔元忠滕
歲皆從葉適游紹熙元年對策言甚切直大要謂
小人之倡為異說以蒙蔽陛下者一曰道學二曰

朋黨三曰皇極夫箕子謂有猷有為有守乃有才
有道有操執之人也今所指為道學朋黨者正斯
人耳奈何反棄之而謂之建皇極哉考官得其文
驚歎光宗疑之格置乙科官終祕書省正字

魏了翁字華父蒲江人慶元中進士韓侂胄謀開
邊了翁力言其不可策出衆大驚紹定中累遷至
同簽書樞密督視京湖軍馬併領江淮開府江州
御書鶴山書院四字賜之已而以浙東安撫使就

醫平江仍賜第焉

高定子字瞻叔蒲江人嘉泰中進士累官參知政事賜第平江仰家橋日以著述自娛為文法度謹嚴高出時輩學者稱著齋先生

鄭思肖字所南其先連江人父震以道學名景定間葬於長洲元兵南下思肖叩閣上疏忤當路不報宋亡寄居吳中念念不忘君形於詩文歲時伏臘輒野哭南向拜精墨蘭更詐後為蘭不畫上根

素不娶得錢則周人田亦捨之僧刹惟餘數畝為
衣食資謂佃丁曰我死則汝主嘗著大無工十空
經一卷寓大宋二字也造語奇澁自題其後云臣
思肖嘔三斗血方能書此當有巨眼能識之又著
心史一編函以鐵匣鎔錫汁封錮沈井中明季有
淘井者得之傳於世

元鄭元祐字明德遂昌人生而右臂脫骭動必以左
號尚左生年十五能詩賦為文有古作者風父卒

來寓於吳省臺交薦不就素不喜著書嘗曰經則經也史則緯也義禮淵藪在焉學者能盡得古人之意者鮮况敢私有論述乎

陳徵字明善江西人嘗從吳澄遊其學務明理不求榮進寓居吳中讀書鼓琴虞集揭傒斯咸推重之

陳揆寧波人僑居長洲著通鑑續編

鄭東字季明平陽人元末避地常熟肆力古文多

不留稿僅存百篇與弟采所作三十篇名聯璧集
宋濂序之

明王禕字子充義烏人洪武間官翰林待制奉使雲
南死節未仕時寓居吳淞甚久集中有吳江客中
冬至及吳江別運上人詩

張羽字來儀潯陽人元季寓吳中與高啟楊載徐
賁稱吳中四傑洪武初徵為太常丞兼翰林院同
掌文淵閣事時大著作多以推羽坐事謫嶺南半

道名還自沈死

徐賁字幼文其先蜀人由毘陵徙居蘇之齊門工詩善寫山水張士誠辟為屬與張羽俱避去之吳興洪武中用薦起家歷官河南布政因大軍出洮岷道經河南缺犒勞下獄死

陳基字敬初臨海人至正時經筵檢討為人草諫章陳並后之失幾得罪引避入吳教授自給南州用兵起江浙行省郎中參張士信軍事士誠稱王

基獨諫止士誠欲殺之不果吳平召入預修元史
書成歸卒於常熟詩文高邁有夷白齋集

吳福字好德鄞縣人禮科給事中預修永樂大典
五經四書性理大全歷陞福建布政愛吳中山水
之秀遂占蘇籍卒葬烏龍山子憲性至孝母喪過
哀事庶母孝嘗以居室讓諸弟郡人杜瓊贈以詩
有今日重逢薛侍中之句

國朝姜埰字如農萊陽人也前明為禮科給事中疏論

周延儒廷杖謫戍宣州衛會國變未赴寓吳城西
二十年顏其室曰敬亭山房不忘戍所也易箚時
誠其子必舁葬宣城其子奉遺命往葬焉

姜垓字如須前明為行人兄塚以言事繫獄垓上
章請代不許國變後隨兄寓吳先塚卒子孫遂家
於吳

李實字如石遂寧人明季癸未進士官長洲知縣
有聲績明亡就居錦帆涇側著書以老子仙根字

子靜順治辛丑殿試第二人累官戶部侍郎文采
書翰照映一時

喻昌字嘉言江西人前明貢士順治初僑居常熟
少遇異人授內養法終身不卧倦則依蒲團小憩
精於醫著醫門法律

吳彥芳字友聖長樂人順治壬辰進士任中牟知
縣丁繼母憂不能歸故里寓山陰既而遷於蘇服
既闕無意仕宦徜徉山水以觴詠自娛闔撫范承

謨將迎之以歸未幾范歿耿逆之難彥芳遂終于
吳

朱彝尊字錫鬯秀水人博極羣書文筆妙天下以
布衣舉博學宏詞授檢討罷歸往來吳中最久嘗
寓慧慶寺選明詩綜百卷

松江府

宋吳惟信字仲孚湖州人記問該博以詩名有菊潭
稿寓華亭白鶴村

邵桂子字德芳淳安人咸淳進士又舉博學宏詞授處州教授國亡不仕娶華亭曹氏女因家於小蒸文名甚盛所著有脞談脞橐

元林景曦字德陽平陽人仕宋官從政郎國亡遯跡寓雲間甚久有訪二陸故居諸作

趙孟頫字子昂湖州人歷官翰林學士承旨書法獨步一代嘗留止上海鶴沙鎮凡近鎮寺院碑記鐘銘皆其真蹟前赤壁石刻向在永寧寺明季郡

守方岳貢移置府之和衷堂

柯九思字敬仲仙居人以陰補華亭尉後為奎章閣鑒書博士罷官因寓松江善畫竹石嘗自謂寫幹用篆法枝用草法葉用八分法

楊乘字文載濱州人至正中除浙江行省員外郎免官後寓居松江後張士誠欲授以偽官遂自縊死

楊維貞字廉夫會稽人泰定丁卯進士歷提舉江

西儒學未赴兵興後攜家寓華亭築元圃蓬臺于
松江之上東南才俊之士造門無虛日其詩號鐵
崖體卒葬于山麓

張昱字光弼廬陵人仕為江浙行省員外郎行樞
密院判已而棄官號一笑居士往來松江張士誠
辟之不就洪武初召見以老乞歸太祖曰可閒矣
遂更號可閒老人

錢惟善字思復錢塘人元鄉貢進士試羅剎江賦

著名寓居華亭與陸居仁楊維貞為詩友洪武初
卒葬干山

明陶宗儀字九成黃巖人少舉進士一不中即棄去
務古學無所不窺遭亂寓松江躬親稼穡耕作之
暇休於樹陰有所得摘葉書之貯奩累十數綴輯
成編曰輟耕錄又有說郭書史會要行世洪武末
為教官賜鈔

秦裕伯字景容大名人仕元遭世亂棄官避地上

海張士誠招之不納明太祖檄起之固辭諭以手
書曰海濱民好鬪而子居之恐有後悔乃強起甚
見寵待

錢鼎字得鉉吳興人從楊維貞讀書松江一室如
破舟力學不怠以古文辭名洪武癸丑徵授國子
學錄

楊仁壽字漁隱天台人明初寓居松江之陶宅能
詩文精草書得鮮于樞筆法時冀北李暉字叔如

無錫華文瑾字雲林與邑人姚汝嘉字愚默稱陶
宅四隱云

麴祥字景福永平人永樂初侍父百戶亮任金山
衛祥年十四海寇入犯被掠後受日本官職宣德
中隨使入貢上疏陳情乞賜歸侍時方柔遠不欲
遽留之但許暫往省親及至金山父亮已卒惟母
尚在抱持慟哭悲動隣里既還日本其國主哀之
仍遣入貢復申前請詔許襲職歸侍事母以孝聞

宋旭字初暘崇德人以畫名萬歷初居雲間與陸樹聲莫如忠周思兼結社賦詩年八十無疾而逝國朝趙炎字雙白漳浦人也居松江工詩選詩藏若干卷嘗為僧開堂說法後還初服

常州府

漢蔣默字秀芳杜陵人兗州刺史詡孫父橫從光武征赤眉有功封侯坐譖死九子皆南徙七寓廣陵二棲陽羨後帝悟其誣就其居封之默居渦湖東

封雲陽亭侯弟澄居西封山亭侯

晉郭璞字景純聞喜人博學好古精陰陽歷數避地
東南居暨陽歷官著作郎

唐陸羽字鴻漸竟陵人天寶中隱火門山上元初更
隱苕溪自稱桑苧翁性嗜茶著經三篇品天下水
惠泉為第二惠泉自此得名

薛戎字元夫河中人客毘陵陽羨山年四十餘不
仕江西觀察使李衡辟署幕府三迎乃肯應故宰

相齊映代衡奏留之府罷復歸陽羨累遷浙東觀
察使

竇羣字丹列京兆人父叔向以詩名羣兄弟皆擢
進士獨羣以處士客毘陵蘇州刺史韋夏卿薦之
朝後擢左拾遺歷御史中丞

杜牧字牧之咸寧人歷官中書舍人剛直有奇節
不為齷齪小謹敢論列大事指陳利病尤切至殖
產陽羨因卜居焉元張雨題水榭詩序云水榭在

義興東郭

李戡字定臣渤海王奉慈七世孫舉進士就禮部
試吏唱名乃入戡恥之返江東隱陽羨里陽羨民
有鬪爭不決不之官而詣戡以辨太和中平盧帥
王彥威表為巡官後還洛陽卒

宋蘇軾字子瞻眉山人元豐七年自黃州貶所量移
汝州上書自言有田在宜興乞居其地詔從所請
未久召用晚年謫海南北歸後復居宜興卒

賀鑄字方回開封人好學藏書萬卷工文詞尤長於樂府元祐中倅太平州以仕不得志退居吳下寓毘陵宜興著荆溪集陽羨歌卒葬宜邑篠嶺

楊時字中立將樂人時在東郡所交皆天下士先達陳瓘鄒浩皆以師禮事之暨渡江東南學者推為程氏正宗居諫省僅九十日凡所論列皆切於世道而其大者則關王氏經學排靖康和議政和初令蕭山秩滿奉祠客居毘陵講學城東書堂從

遊者雲集

洪适字景伯鄱陽人母沈氏毘陵人父皓使金被
留适與二弟遵邁依舅氏讀書後俱中博學宏詞
科适官至宰相遵樞密使邁翰林學士

周必大字子充吉水人嘗寓宜興淳熙間歷官左
丞相封益國公紹定初邑令趙與懋建先賢祠合
鄉寓賢祀之必大與焉

呂祖泰字泰然婺州人夷簡五世孫寓居宜興性

疏達尚氣誼嘉泰元年上書乞斬韓侂胄流欽州
侂胄誅授迪功郎監南嶽廟

元陳祖仁字子山汴人少時侍父安國令武進因家
焉至正中累官參知政事順帝北竄或勸祖仁南
還不從城陷被殺

國朝李顥字中孚盩厔人也潛修不仕遠近皆重其學
行稱二曲先生浙西駱鍾麟為西安府同知執弟
子禮事之康熙八年鍾麟遷常州知府建延陵書

院延顯主席率郡之士大夫會講其中

廖大受字君可福建人寫照精絕識者謂曾鯨之後當推第一海內莫比久客宜興卒於旅次

鎮江府

漢史崇字伯勤杜陵人建武中官青冀二州刺史以功封溧陽侯天下既平詔公侯皆就封因家焉卒謚壯侯孫茅累官雍州牧裔孫嵩仕吳為蒼梧守許劭字子將平輿人有高名與凡靖共覈論鄉黨

人物每月輒更其品題故汝南俗有月旦評或勸
劭仕對曰方今王室將亂吾欲避地淮海以全老
幼乃南到廣陵徐州刺史陶謙禮之甚厚劭謂其
徒曰陶恭祖外慕聲名內非真正不如去之遂復
投揚州刺史劉繇於曲阿其後謙果捕諸寓士

晉祖逖字士雅范陽人避亂居京口慷慨有節尚與
劉琨共卧聞雞鳴蹴琨曰此非惡聲也因共起舞
元帝時拜奮威將軍豫州刺史

徐邈東莞人永嘉之亂渡江家京口博學多聞謝
安薦補中書舍人撰正五經音訓學者宗之在西
省每被顧問多所匡益遭父喪哀毀卒弟廣字野
民學尤精博官祠部郎撰集國史子諮為西陽太
守為盧循所害

何無忌東海郟人居京口同劉裕起兵斬桓修侍
衛安帝以興復功封安城郡開國公遷鎮南將軍
舟師拒盧循敗績死之謚忠肅

檀憑之字慶子高平人居京口累官寧遠將軍義
旗之建與劉毅俱以私艱墨衰從事至羅落橋戰
敗被害贈曲阿縣公

南北朝宋劉穆之字道和東莞莒人居京口宋武帝
克京城署主簿從平建業諸大處分皆倉猝立辦
累遷尚書僕射帝北伐留穆之內總朝政外供軍
旅決斷如流五官並用不相參涉能一日作百函

書

向靖字奉仁河內山陽人寓居京口討盧循著績封安南縣男宋高祖受命加散騎常侍卒立身儉約不營屋宇無田園商貨之業時人稱之

檀道濟高平人世居京口從武帝平京城武帝北伐為前鋒所至望風降附進位司空鎮尋陽以威名甚盛為彭城王義康所害

劉勰字彥和東莞莒人寓居京口博通經論撰文心雕龍五十篇沈約重之辟記室累官步兵校尉

孟懷玉平昌安邱人世居京口宋武帝伐孫恩以
為建武司馬預義旗從平京口定建鄴以功封鄱
陽縣五等侯

何承天東海郡人居京口宋祠部郎與傅亮共撰
朝儀歷著作佐郎御史中丞嘗刪定禮論三百卷
改定元嘉歷帝每有疑義必先訪之

鮑照字明遠東海郡人文詞俊逸尤善樂府累官
中書舍人後終臨海王參軍

梁徐勉字修仁東海郟人居京口入梁遷尚書吏部
郎參掌大選嘗與門人夜集客有求詹事五官勉
正色曰今夕止可談風月不宜及公事

徐陵東海郟人居京口歷官御史中丞奏彈勢要
朝廷肅然其文新麗時號宮體

王僧孺字僧孺東海郟人居京口傭書以養母仕
齊終安成王諮議參軍聚書萬餘卷為文麗逸多
用新事時重其富博

唐權臯字士繇畧陽人徙潤州丹徒舉進士第安祿山表為薊尉署幕府度安祿山將叛使獻俘京師佯死脫去潛奉母南奔天下聞其名爭請為屬永王璘舉兵又詭姓名以免顏真卿李季卿皆表薦不就卒謚貞孝子德興

權德輿字載之德宗時名為左補闕疏斥裴延齡奸元和初拜同中書門下平章事德輿善辯論開陳古今本末以覺悟人主為輔相寬和不為察察

名文章雅正瞻縟動止無外飾而自然可慕為縉紳羽儀云卒謚文

張祐字承吉南陽人愛曲阿地古淡遂家焉作宮體小詩辭曲豔發後稍變建安風格

宋石延年字曼卿宋城人寓居丹陽慷慨喜談兵不遇而隱於酒與歐陽修善三喪未葬范純仁舉麥舟助之

張慤字誠伯樂壽人家金壇建炎改元為戶部尚

書同知樞密院事請募三河丁壯聯以什伍為巡
社法在朝諤諤有大臣節卒謚忠穆

陳汝爽字公武晉江人徙居丹徒登進士知海州
歲饑不俟報發廩賑為監司所奏爽請以身坐毋
及僚屬朝廷嘉之置不問母歿遂不復仕

沈括字存中杭人徙居丹徒官至內翰其學無所
不通皆有論著子孫家於京口

元傑列簾畏吾人居溧陽中至順庚午進士為潮陽

令罷歸過南昌值紅巾亂協守東門城陷闔門盡節

王昌字榮之益都人為鎮江路總管府提控因注籍焉歷官餘杭縣尹經理田土前官增賦十之二昌力言於行省復其舊民立石頌德

莊麟字文昭江東人元末移居京口書畫詩文與郭天錫齊名

明秦從龍字元之洛陽人仕元會兵亂避居鎮江太

祖克集慶謂徐達曰鎮江有秦元之者才器老成
吾欲見之達訪得之帝喜甚朝夕同處每以筆書
漆簡甚密稱為先生後告還鎮江病卒帝親臨哭
之

湯允績字公讓東甌王和之孫居丹徒尚書周忱
巡撫南畿薦其才累官都指揮僉事充參將守延
綏寇入往禦之被害允績才性敏捷為詩豪邁奇
崛所著有五雲漫稿東谷遺稿

國朝王源大興人也博學多著述負經世畧人稱北方
學者晚寓居金壇子兆符康熙辛丑進士

淮安府

唐李珣字待價趙郡人客居淮陰舉進士開成中歷
官同平章事武宗時坐貶宣宗立遷河陽節度使
罷橫賦宿逋百餘萬請立太子維天下心卒謚貞
穆

宋趙槩字叔平虞城人始為進士時漣水守鄧某館

之於官舍未久謝去後槩守漣水將至或榜其所
館曰豹隱堂賦者三十餘人累官參知政事以德
量稱

陳瓘字瑩中劍州人徽宗時為諫官劾蔡京謫居
合浦著尊堯集言者以為詆誣益加貶竄最後楚
州居住

馬存字子才鄱陽人寓居楚州慕節孝先生徐積
道德從之游卒業於其門

明黃諫蘭州人寓山陽正統間以尚寶卿兼侍讀出使安南詰迂路定禮儀辨坐席辭餽贖諭請正朔安南奉命成化初左遷廣州通判卒葬山陽

揚州府

唐寶常字中行京兆人大歷及第進士客廣陵多所論著杜佑鎮淮南署為參謀歷朗夔江撫四州刺史國子祭酒致仕卒弟牟羣庠鞏皆工詞章時號五寶著聯珠集

辛謹蘭州人太原尹雲京孫居揚州慨然常有匡時意龐勛反攻杜悛於泗州謹趨贛賊柵以入與妻子訣同悛生死乞兵淮南復詣浙西時傳泗州已陷疑謹為賊計囚之李嶧稱其忠可信乃許救謹引兵決戰斬賊六百級泗圍凡十月至是乃解卒完一州以功授亳州刺史終嶺南節度使

南唐嚴續字興宗馮翊人祖寶為江淮轉運判官徙家廣陵續性恭謹仕南唐歷官門下侍郎宋齊邱

專國公卿多附之惟續持正不為屈

宋張方平字安道其先宋人徙揚州舉賢良方正首
乞合樞密之職於中書以通謀議帝然之以侍講
學士知滑州徙益州或扇言儂智高在南詔將入
寇調兵築城民大驚擾方平出鎮言南詔去蜀二
千餘里安能為寇當以靜鎮之妄言者斬蜀遂安
神宗時力諫用兵卒謚文定

陳次升字當時仙游人僑居真州舉進士為御史

謫監稅徽宗立召為侍御史極論惇卞曾布蔡京之惡羣奸側目崇寧初落職除名徙建昌編管循州終於真州

宋應龍儒生通兵為詔議官寓泰州元兵至泰州官吏迎降應龍與其妻自縊於園中

元沙卜珠介字仲清中統間為江東宣慰使去官家真州嘗延張頴吳澄為諸子師講論有得疾篤麾妻妾環侍者出曰男子不死於婦人之手遂卒

吳澄字幼清崇仁人寓居真州薦有道歷官至翰林學士所著有五經纂言卒謚文正

郝經字伯常陵川人為翰林學士世祖即位使宋定和議時賈似道方以却敵為功館經真州經上書極陳戰和利害請入見及歸國皆不報驛吏棘垣鑰戶欲以動經經不屈後伯顏南伐問執行人之罪以禮送經歸

李茂大名人徙家揚州父先卒母嘗病目失明茂

禱於泰安山三年復明每夕祝天乞損己年益母
壽母没居喪哀慟聞者傷之大德九年揚州火災
燒千餘家火及茂廬皆風返而滅事聞旌之

明羅汝芳字惟德江右人客居海陵窮理樂道教人
以體驗方寸學者稱近溪先生陪祀王艮祠

鄒元標字南臯豫章人立朝以直諫著僑寓儀徵
之五廟與邑舉人林之翰立講壇於信國公祠闢
說治心養性之學

高宗本字茂卿，雄縣人。仕至河南副使，歸寓江都。自號江淮逸叟，究習郡邑掌故，著《維揚新志》。

鄒應龍，字雲卿，蘭州人。父賈揚州，遂家焉。為御史，劾相嚴嵩及其子世蕃欺罔不法事。嵩父子以是謫，誅擢通政司參議，仕至雲南巡撫。

何城，字叔防，榆林人。父炫，賈揚。因家江都。嘉靖壬辰進士，由庶吉士改刑部主事，知武昌府。楚世子英耀與所幸甘玉海謀為叛，城飛書白巡按乘其

未發先擒玉海杖殺之散其護衛楚中晏然世子
伏法陞冀南道罷歸倭寇作亂議築外城時多迂
之未幾倭犯揚州城外蕩然煨燼城中安堵城之
力也

高邦佐字以道襄陵人居江都萬歷乙未進士天
啟初官參政分守廣寧值熊廷弼王化貞構隙邦
佐知事必敗乞歸方報允而化貞棄廣寧走衆謂
邦佐可入關邦佐叱曰吾一日未去則一日封疆

臣也將安之策騎謁廷弼請授兵赴難不納乃令
從者歸報母解印綬自經僕高永亦自經於側事
聞贈太僕寺卿謚忠節

朱世賢字用賓先居臨清州累官至少卿剛直不
事權貴致仕移家廣陵捐千金築新城復出千金
建義倉孫珏以畫名

費經虞字仲若新繁人崇禎己卯舉於鄉授昆明
知縣罷官歸蜀遇亂流寓江都以不得養親為恨

忌辰哭泣終日至七十猶然門人私謚孝貞先生
所著有毛詩廣義四書字義古今方書周易參同
契

國朝梁以樟字公狄清苑人明崇禎己卯舉鄉試第一
庚辰成進士與兄以柎寓居寶應繼言著書以老
有忍冬軒集

趙開心字洞門長沙人寄籍江都三為御史清直
見稱仕至工部尚書

張恂字穉恭涇陽人先世以業鹺家江都崇禎癸未成進士天才雋邁肆力於詩古文詞兼工畫筆孫枝蔚字豹人三原人幼為諸生遭流寇與其鄉少年奮戈逐賊落深塹得不死乃走江都從賈人游三致千金皆散去既而閉戶攻詩古文辭名噪海內康熙己未以博學鴻辭徵授中書舍人著溉堂前後續集

費密字此度經虞子文行肖其父所輯有弘道書

正紀聖門舊章及自著詩古文辭若干卷子錫璜
字滋衡能世其家學著有雅倫貫道堂文集掣鯨
詩集

魏禧字凝叔寧都人性孤介賣文自給人士重其
文行爭延致之寓真州卒妻某氏聞訃不食死

黃逵字儀逋山陰人棄諸生遊晉所主者資之南
歸客泰州負才嗜酒落魄依查士標以居查死遊
上海病卒其詩凌厲悲壯有其鄉徐渭風

徐州府

漢張良字子房韓人五世相韓秦滅韓求客報仇得力士為鐵椎擊秦始皇於博浪沙中始皇怒大索天下乃逃匿下邳遇圯上老人授書佐沛公定天下封留侯

閔貢字仲叔太原人建武中應司徒侯霸之辟尋投劾去客居安邑家貧不能得肉日買猪肝一片安邑令聞之勅吏常給焉仲叔歎曰閔仲叔豈以

口腹累安邑耶遂去客沛

李燮字德公太尉固幼子梁冀害固並收其二子
固女文姬知父將及難以燮托門生王成成乃將
燮東下入徐州界燮姓名為酒家傭成賣卜於市
陰相往來燮從受學酒家異之以女妻燮燮專精
經學十餘年梁冀誅求固後嗣遂還鄉里姊弟相
見悲感旁人徵拜議郎遷河南尹

江革字次翁臨淄人負母逃難轉客下邳蹀跣行

傭以供其母便身之物莫不畢給建武中與母歸鄉里人稱之曰江巨孝

申屠蟠字子龍外黃人初范滂等臧否人物非訐朝政太學生爭慕其風屠蟠獨歎曰戰國之世處士橫議卒有坑焚之禍今之謂矣迺絕跡梁碭之間因樹為屋自同傭人滂等果罹黨禍蟠確然免於疑論年七十四終於家

范丹外黃人桓帝時為萊蕪長朝議欲以為侍御

史因遁去布衣草履賣卜梁碭間

丁蘭河內人少喪母乃刻木為像祀之居豐縣東
十二里後人名其鎮曰丁蘭鎮里曰丁蘭里

三國張範字公儀河內修武人性恬靜樂道不就徵
命董卓作亂與弟承避地彭城範子陵及承子戩
為山東賊所得範直詣賊請二子賊以陵還範範
願以陵易戩賊義而并還之後為議郎參丞相軍
事太祖征伐常令範與世子居守謂文帝舉動必

諳焉

宋孔恩宣聖五十代孫南渡徙居蕭

元羅曾魯橋人登進士授儲司院山長教授孔顏孟
三氏子孫元末避兵宿遷因家焉

國朝沙傑字仲渠真定人從其父遊豐國初羣盜竊發
縣令閻知傑魁竒延與共守禦所殲除者頗多一
日策蹇自徐還或識之怨家噪黨圍之傑挺身力
戰被害其子弟家於豐能讀書

太倉州

宋林英發永嘉人贅居嘉定知建昌縣戡定洞寇擢
知壽昌軍趙與憲嘗師事之卒葬蘇州穹窿山

元吳野人名轍字中行台州人元末遯跡泖濱懸壺
陳溪之上顏其室曰野人居倪雲林為之繪圖

張天永字長年淮南人元季奉母避地嘉定時人
稱其孝比之江革

明文質字學古溫州人徙太倉有學行工詩古文嘗

與楊廉夫玩梅花燈賦詩有歸來踏遍橫斜影吹
落東風不見痕之句人傳誦之

孔弘幹字克勤孔子六十一世孫也後唐時四十
二世孫名檜由闕里徙溫州至五十一世孫名塋
宋紹興間以武功大夫統制江陰軍十傳至幹天
順中娶于太倉遂家焉幹醇謹誠樸端方不苟太
倉有孔氏始此

通州

宋任伯雨字德翁眉山人為右正言莅官半歲所上
一百八疏大臣畏其多言伯雨抗論愈力且將劾
曾布布覺之徙為度支員外郎尋知虢州崇寧黨
事作削籍編管通州



江南通志卷一百七十二